

四庫全書

集部

欽定四庫全書

滄溟集卷二十八

明 李攀龍 撰

書

報戚都督

維齊在昔蓋多名將云士之談境土之盛者至我尼父  
莫敢抵齒固矣猶之稱師旅焉亦無敢抵齒于我穰苴  
孫子者也然兩家區區在二國時獨以解燕罷晉西破  
楚耳非若今之彊倭轉冠東南數省殆遍唯公建大旗

鼓掃清海上大小百戰無不奇捷遂壯皇朝之氣而遙制江廣使諸偏裨得賈餘勇填盪潢池功不且半天下乎不佞實為諱之想見其為人也辱示新刻觀公行事所施設者閎廓深遠不佞雖未能竟其義恐即司馬法十三篇不能過也足下起閭伍之中而弱冠登壇海上之役籌策明矣是書也政自論其行事所既施設者尤非懸度此何以讓穰苴孫子哉竊聞綏履蓋在吉甫宴喜之秋與汪中丞雅歌相和而王元英雄才篇章交映

是為質有其文武焉如不佞越在田間惟公重望錫我  
桑梓既已竊幸何乃亦復下存用頒篚璫而注屬如此  
報戚總戎

不佞有浙之役則我公聲洽於海上古方叔之壯猷無  
過焉未嘗不翹然願一望見顏色矣詎意假道還朝披  
覩長者驩如平生不常款接謬辱清裁愈益瞻注不佞  
至自拜表則公之美譽盈庭英實四達秋云高矣漠南  
宴然近年以來其在于今羽檄交馳之時也獨非大將

邪何公之先聲乃如此詩云征伐獫狁蠻荆來威公威  
蠻荆而獫狁來威聖天子在上簡書非常之遇乃公輒  
試輒效以釋聖天子北顧之憂而使邊陲被安堵之慶  
厥功茂矣不佞與里閭之勞施獲再望見顏色不勝大  
願無已則有聞問起居焉唯是珍攝膺寵以副凱旋燕  
喜之祉

與戚元戎

有味乎公之言兵雖稍增而計日可罷者過之財雖暫

益而他日所省者倍焉其猷一何壯哉至謂將官廢習  
技而教流黃鉸造之巧以為奇貨中動貴人遠事漠北  
又何痛時弊如此其切也然則天下注意我公而聖天  
子倚重之者當奈何無已則所謂寧置其身於鑠金銷  
骨之鄉不枉其道以求悅以求事立云爾斯大忠之定  
誼矣我公既在久之將習服則自求練卒卒習善則自  
求利器况志存報主者多其人之為可恃也防秋別議  
已有成命是又我公之揚韜敷畧之時也邊陲幸甚里

開寵光在此舉矣

報劉都督

始劉將軍之名滿天下不佞願見其人者十年於此矣  
未嘗不私竊念之挾百戰百勝之功者不免自暴其才  
而中一朝無辜之謗者不免輒挫其志賢者猶難之也  
乃不佞以攝海之役執事者儼然辱而臨焉獲承顏色  
傾蓋如故先施自致不鄙下交由衷之誼披瀝惟謹有  
孔明集思廣益之風而慷慨以之即過意延款使不佞

繾綣重別緬縷舟中不自知其盡境恍然自失如目前  
者勿論也不佞既東陌落恬然秋毫不犯登塲大閱復  
覩紀律森嚴士氣距躍技藝精真可蹈水火艤腫便捷  
投枚記里槩舵之利折旋如活礮石四興波濤響應削  
梯樹檣示疑設伏所徵叙瀘弁旄之步閩粵善游之徒  
三河挽彊之騎輩相扼腕唯敵是求乃日椎牛行犒而  
帷幄自愛也可暴豈其才可挫豈其志乎天既以虎臣  
託執事久矣然猶且有激乎宦成之後者動其所必奮



堅其所久立云爾大忠完節愈困愈厲而劉將軍之名  
愈振矣不佞何能贊一辭即有問焉攝海之後不佞所  
以深覲其美者如此庶取信狂夫以備稱述耳於甚盛  
德則奚補焉乃既奉違恍然自失有如目前至今不置  
非敢為誕也

劉總兵

始以前汛視海奉接顏色乃茲畢役矣契闊何如唯是  
威望素崇振及萬里不遺一矢海波晏然厥功大哉東

道之便不佞敬勞將軍即雖冗僚安枕是賴用感述焉  
向再辱諭欲以二鹿見餉已知麾下士驩馬騰暇而校  
獵豫卜畢後無形之勝用賈餘勇今幸割鮮以犒從者  
即若不佞謹致單醪云爾新茶一觔上充雅歌之清賞  
以効別忱凱旋竢有嗣請不次

與劉總戎

日過朱大司空抵掌談足下聲實俱茂今之大將也使  
委兩廣而制之魯之民已挂長纓伏闕下矣惜乎置之

海濱而令勇無所施徒以距踊超騰日饗士為樂耳此  
公平生愛才首薦不佞一時知名無不延納今已入補  
當為我公游揚推轂無疑猶曰某知人益可徵也向得  
戚將軍書言邊事掣肘足下寧願之乎長君諸郎日玩  
膝下二夫人與諸佳麗歌舞飲帳中何如不佞磬折貴  
人門也

報李叅戎

詩有之剛亦不吐則公之拒伊庶人也仲山甫之為德

焉不肖孤扼腕言天下士願交驩公久矣在陳傾蓋雅  
意一時至今未忘念不可報先慈見背矣方愧大梁署  
中猶尚淺乎其為緇衣之愛也未敢計聞而使者追及  
于曹致賻惠焉何以有此於長者乎以庇二十六日抵  
家訖便附謝悃以慰永懷哽咽不次

報鄭叅戎

不佞以庇凡叨二省咸我永侯開閫之地流風具存不  
佞里閑借餘用光并殷懷止安得握手尚茲一堂也竣

賀周旋游于北園飛雪之夜言歌且奕者誰邪戀戀可知已謹啓告至以慰高情憐察不盡

與黎都使

貽我來牟公盖自淮徐千里而近矣酌言嘗之乃沾汗如身在故鄉者非投醪之惠耶至今念之與其矜南之奇也寧北而狎處斯又不佞託於長者哉

報施都閫

日承使致大藥小械當已覽裁矣某不佞一奉顏色私

竊念之安有用意如此其篤信而大道不至者乎極知  
公嘗試某可援而入之不可耳雖甚愚陋稍知禁秘後  
轉勿吝傾示必不辱一門下也何如人便附謝起居不  
宣

報聶都閫

唯是我公大制閫貽茲陳臬者相勸與朝夕乎中州之  
役也奈何以太淑人違養遽奪此誼也天實不弔而公  
辱慙恤匍匐旌賻輦及不淺矣

報韓都閫

不肖孤得以鄉曲之誼從事中州也自謂朝夕乎平生之驩相勸于後矣先慈之變曾是不意而公實日臨焉以佐匍匐舉大禮賻贈覃及遠勤導使百爾為愛荒迷之中張張之謂何而敢忘指示之德也

荅蘇州王使君

西時過大名署中至今念故人高誼無已即亦為一飯不忘鉅鹿耶春秋實六易矣海邦盤錯不佞知必借使

君而績滿以遷又非以待國士雖蘇既入生息以之即使君亦惟是顧復奈何謂以三年淹也不佞杜門伏枕業為僻情之夫五載於此安得札貺從天而下則戮餘之氓屬使君車下如元美者感遇可知也

報金蘇州

某不佞亦唯我公宿學特行建標吾黨人自取裁不求聞達其在不佞尤謬薦寵雖悄然稠廣心固已默識之矣即形迹之疏數曷計焉日辱延召再承出餞不勝感



戀僕旋報至附上起居嗣音不盡

報陳保定

其在濟南則唯我公儼然大老也吾黨小子無不知公之抗節三輔為守臣者即無不知公之為隱君子誼甚高矣或出或處誦德豈有窮時此不佞某與有寵光於公者不報也日承延召祖餞稠疊僕旋告至用附起居  
炤諒不備

報張開封

不佞之所得托乎陳臬者凡以取繫乎郡也薄祿之孤  
匍匐用勩而能坐享二千石之政平訟理者乎曾是不  
意先母以一夕之疾溘然見背倉卒暑伏計出蘊裡孰  
為敦事盈尺之槨木若以美然者非公乎思母而及槨  
思槨而及公惟忘其母斯公是忘孤何不幸大變如此  
何幸公以長者收視如此也使不肖孤當大事什舉其  
八九矣不可不知也

報李二字

不肖孤所得扶柩東旋者郡大夫力也公匭匱多矣乃益推鄉曲申之賻贈為愛無已時孤何以有此於長者乎

報周推府

不佞何幸公之臨是邦而理之也謂父母孔邇顏色斯日承之耳奈何不夙戒焉而遣館則車駕出謁矣至今怏怏唯緇衣之愛未致而其無能為役所恃以匡不逮用錫貴省者未請也戀戀可知已僕旋報至并附起居

炤察不盡

報魏推府

曩唯辱領公寵而延欸門下視昔關中之役驩馬一堂  
者時也則十年於此矣菲劣乃叨今命用刀筆吏案牘  
自苦安得若我公據九鼎演丹經服食為樂乎僕旋附  
謝并致起居炤察不盡

報歸德潘通府

不佞孤業已違慈所由以扶柩汜濟者其大節也天實

不弔而公匍匐於河上執紼用勸致兄弟之誼者故人  
乎覃賻臨奠惻然此心

答馮通府

文大業也校文大役也秦漢以後無文矣今目古今文  
十卷有之乎明興一二君子天啓其衷輒窺此契然而  
一經傳誦動駭耳目未嘗不以為不近人情者不知千  
有餘歲精氣旋復遂跨遷固勢必至爾滔滔者天下皆  
是也而誰以易之哉不佞憂居百凡荒廢篋中集四冊

奉塞葑菲之命雖不敢當作者然其締致亦苦矣足下  
秉鑒執林持衡詞苑固某所長鳴於伯樂而一顧自喜  
之時也儻辱財幸斯埃百世無疑焉唯是塗揭卻示以  
匡不逮而勸詞請是同筆研之誼也近代諸公無非哲  
匠足下當已采錄過此恐難言矣據所見而次之何害  
乎縹緲不吝寄貺與聞其政媿缺何如

荅殷鈞州

孤不佞蓋承乏中州焉唯公之共理而勸茲于臬之後

也通許之遇從容片語蔚雅風流尋接省中注存郡秉  
所圖典籍其紀遠矣大政日新而先慈見背不獲遂嚮  
止之初心以効揄揚於萬一快怏自失耳乃辱使者儼  
然臨祭寵以奠章其曰念此兩河民瘠土确仁哉父母  
之言乎哀愍之私不替既往厚自性德非獨腆貺也龍  
何以有是於長者哉旋便附謝摧隕不次統維憐察

報陶睢州

魯先生同列薦章以母老辭銓曹之命非足下郡中士

乎孤以母就祿而遘禍如此則足下儼然臨貺焉孤何  
顏以立天地間也祭不遠百里已矣而重之以賻則長  
者之誼甚深不可不知也

報謝祥符

先母之變倉卒暑伏纍裡之外計無所出乃謝長者誼  
為棺槨遠莫致之則足下會車以載式迺其行俾不肖  
孤得以當大事於什九匍匐為勦賻賻稠疊儼然臨焉  
為我心惻維親不忘敢忘足下乎



報內黃王令

天縱之才辟之飛黃結綠其步驟合乎人盡奇之不必  
卜樂矣不佞承乏關中得足下於髫齡蓋遠遇之耳自  
我不見誰其舍諸而敢貪天功為已力乎况復不數年  
而舉進士出宰百里由是以躋崇揚烈載錫之光為不  
佞重使得以藉多賢蒙鑒裁之稱者哉輒辱存問是明  
不鄙雖足下性自篤誼然即所不遺故舊而加意百姓  
以為百里父母者可因識其循良之績矣既以緒餘成

政而游息於藝文以嗣家學奚但仕優則然也近會王  
元美備述足下為屬吏之最者狀云三郡一令矣此公  
少推與而獨極口足下矣

報易亭中尉

足下好士如不勝所交多君子也不肖孤蓋信陵高之  
相勸以成大美矣老母之變不意奪焉人才之難豈獨  
其天乎

報松泉

以孤觀於公之福德蓋冲雅而耻以才自見質行君子  
也多男而多賢者詩書之聲皦於絲竹揖遜之容泰於  
富貴孤不佞辱茲秉憲扼腕大國之風矣老母之變臨  
祭儼然敢忘答稱使旋附報庶慰永懷哽咽不次二君  
子幸為道及

報一樓

孤遊大梁中所睹翩翩佳公子也烏有如足下美秀而  
文者乎信乎才自天出之異乎人也屬方抵掌談古昔

藻雅之士論世尚友而老母變作矣儼然臨祭蓋戚然其爲心有餘悲者何以得此於足下哉

報于子長

日承不鄙即儼然袞服之中三致意焉其盛秩席而召延之也乃不佞既不逮執紼之役於太夫人而奠賻無狀奈何復辱推餞益形菲劣乎唯是銜德負罪並以爲謝僕旋起居垂炤不備

報王子利

不佞所辱足下延欸者三而未能趨領也可以置之矣  
則攜珍而饗之以致臨幸出餞于郊遂睽仰止然所恃  
兄弟之好而為豚犬駒觀法焉以庶幾無大笑者不佞  
未嘗一日忘也僕旋告至謹附謝聞炤諒不備

報鄭永侯

黎公至浙乃得足下起居不任大願永侯勉為一出也  
以足下宿將開府兩越大名矯矯而抱未盡之蘊人其  
舍諸不佞悠悠雖在欲棄欲取之間不敢謂援足下以

自重矣此中世情一符面命而新政操切尤非昔時圖  
歸之心夙夜不置矣

與劉希皋

十年家居稱貸瑣屑不計子錢用濟屢空贍及病友方  
欲立逸老之會以樂餘年而高卧不堅復此婆婆甚愧  
夙心矣

與張少坤

人言不佞不難於不出而難於出其然乎聖天子過意

病臣無以答稱寵命此其出而自嘗所由以充乎不出之類者備是矣初尚以邨曼容薄游自喜乃復渡江興盡力勉遁思抵浙奔謁無暇起居失次深愧高卧之不堅丁躬自瘁夫何尤焉郊別馳戀不任長者十年登然之愛圖報無時耳

與趙仲鳴

不佞雖今薄游乎計唯中返使諸君子謂不佞初自三秦拂衣者非敢為矯也慮城一別遂遠聞問抵浙趨冗

為勞辟之桺鹿豈能一日而忘在野自知此態是閑福  
德然而性定之矣可奈何歸思之方永也

與吳思睿

思睿知我四十年矣嬾不能事何可復羈風塵之中念  
久高卧聊試一出至則興盡不獲遽返何見之不蚤也  
非敢為偽以予視思睿老鉛槧之役息業未效常令玉  
函之廬契闊城市何異白首隨牒自貽伊阻王舍城二  
頃田種秫自樂



與金蘇州劉延安陳保定公谷宜興

不佞吾黨小子也越在田間三值奇疾用是不獲執御  
於長者之側十年矣濡德先達私淑孔邇致有是役實  
惟長者之教所及而由某以著我濟南多賢薦寵下輩  
之誼不能忘者南發復辱祖饒嘉興至渥承庇履任出  
謁無暇尋念山林輒圖中廢將恐舊態不久更作以貽  
諸老笑奈何幸終始成愛以示不鄙矣

報李伯承

辱庇先慈乃襄大事方念濮陽遮祭寵光道路未能報  
謝而愍諭至矣是日也實唯小祥之期視公所云雨中  
銜淚為別者又一寒暑會晤可圖先慈不可見矣悲哉  
追言夙昔未嘗不戚戚於長者之誼奉讀哀咏蓼莪之  
響摧隕自失賴業服膺稍陶沉痛耳公以雄才詩名重  
當世而晚得主器精健岐嶷即宦游蹭蹬正唯含飴之  
樂日殷膝下不以彼易此者而況出自邱嫂貴嫡方處  
家政定如九鼎矣而今而後是公高枕之秋也不識讓

畔之俗可以關美後宮之盛遣所不及御乎此固公所能也又何以堪輿家言為哉

報張肖甫

改元之歲先妻襄事矣帝命尋下乃先太恭人捐簪珥而犒邸走也于浙之後蓋捧檄之情渡江周旋元美子與二君子鼓足抵掌未嘗不忘逝矣西土之人非滇則粵安得厚集禹會壇玉帛旗鼓以快平生說不朽某亡論關凡六月自藩入賀再晤二君子雄飲海岱之間

相視飛動即舉酒逢酌亦惟二三兄弟遙駸駸生色如  
從楚蜀起者元美得足下代固奇而所代復不佞豈不  
益奇正以不與黨乃二三兄弟翩翩維新之會恥且彙  
征因以自詔俾免間耳過此則雖元美乞骸之疏行豈  
為遺憾哉在昔學士大夫掇拾聽說掩其不技如元美  
所謂跳而匿諸理者不自知病癯矣即輒據顯貴終豈  
謂此輩效也足下自負才氣不欲居吳徐二君子後是  
天之未喪斯文又何患乎心神不自致也引示恒嶽諸

篇合轍迹元美此相為代之效甚明矣先慈所棄不佞  
孤於汴中垂踰年者兄弟之誼不忘使奠且先吳徐二  
君子懃勞備至寵錫大亨某何以圖稱萬一於此昔所  
出宰而按轡臨之樂哉其尚良食

報周象賢

公乃坎壈失志所不日夜圖之者有如漢水然二中丞  
交章薦列不以既去為解鹽焉惟恐賢者謂不知已公  
之名重天下矣則元美有心哉不佞何効焉曩以入賀

辱公遣餞計為報而先慈之變作矣再誅承弔兼之腆  
賻不遠千里為誼過厚也不佞為致啓大宗伯者力竭  
于此唯公財幸使旋附謝并布候悃摧隕不次

答灌甫

日辱愍藉惻然未報也乃所有則夙夜倚次服念高誼  
勿忘云爾敢復望嗣音久而益存乎曩為匍匐豈猶未  
至而蠲吉馳示使在萬全恐墮俗術為失仁人孝子之  
至意此其大德何能萬一答稱也念唯贊國興文日勤

執事而意遙及此某益不知其所由矣左史後便附候  
陳謝統乞垂炤推隕不宣

報灌甫

凡客之游梁者蓋莫不問禮足下稱博物君子也秉憲  
之役多聞是依未盡所請而奪以大事老母逝矣猶若  
有遺焉而顧之不可致則維足下之故哉儼臨賻祭用  
識不忘跂予冀章幸終為示

五月六日灌甫中尉誕辰啓

茲審赤德覃宗朱明戒仲臺流玉吹清聞子晉之笙壺  
瀉金漿美薦鄒陽之酒大河演裔永言接於天潢維嶽  
降神久視偕諸少室期一日而長彌高靖郭之門境千  
里而遙懸映小山之賦某游孝王東苑自惟枚叟斯朋  
仰公子信陵深愧侯生虛左謹篚二瑱擬續五絲幸值  
浴蘭之晨尚存氣味益熾然藜之火不棄芻蕘

報朱用晦

今天下二三君子者不佞之所習也其於取友明卿徂



喜中必其獲德甫鵠立偶斯不乖咸惟足下一人焉以之則足下可知矣此不佞之以習明卿德甫者知足下也而握手無論焉足下若猶是脫穎大藩日數諸公之門所握手者何限將明卿德甫無論又何為千里慕義以謬託不佞而介之寵靈以彼易此必不然矣然後由諭而觀所扼腕於同聲執鞭於大雅者如就中原而周旋焉始為媿快重以風寒易水赤幟當時尺牘生色片辭入致忼慨自雄翩翩俠氣可想見矣將由足下蓋習

明卿德甫則二三君子者取友安有極也不佞十年自  
棄巖穴不深歲辱三遷不遑將母無補清朝而又未敢  
遽乞病免坐恐此道尋荒仰孤足下相存美意奈之何  
不佞七言律成篇而已樂府落落似合似離今何以當  
足下之心而曰千古天授也將由足下益知不佞則何  
以哉然不佞之所徼惠於足下者以為非今嘗試則不  
復也業已白首効菑惟以無累二三君子者是圖則足  
下固無有同舟之役矣無亦以二三君子為累者圖之

不佞不勝大願於嗣音如此

與華從龍書

從龍足下不佞某僻夫也杜門謝客三年於此矣即未見好士如足下其人也足下不遠千里再致書於僕而再不得報於僕可以已也而三致書於僕足下即自昭曠無校其在某何以得此於左右無亦恬愉之誼有槩乎足下之心千里而一知己所猶謂比肩者與梁伯鸞有言將遙集乎東南豈所望於君之廡下哉不但來諭

所云渡江而弔元美也

報聶儀部

向伏西曹爰竊夙裁意獨偉焉垂及宮牆而公拂衣出  
矣不佞拘除郡省不任貽肆自棄明時杜門七載僻疾  
已錮久無聞問於長者適奉手教從天而下謬許神交  
某何人敢辱此誼然公尚論之旁情也以視握臂一堂  
相得驩甚在昔有言不可當吾之世而失諸侯非所欲  
不朽一大事乎明妃六曲可以怨矣輒取附和見同調

之雅并代居云

報廬陵劉夫

陳憲使至致公書而公復致以聶公書至生僻人耳其於長者徒以一時游譽謬承薦寵久斯置之矣今安得十年之後猶辱記憶不以竊伏蓬蒿之賤數千里外而勤執事者乎不愛以其師身為介而并得所致以為故人重者乎此計無他豈其蚤歲自棄有槩於足下歸潔之微旨乎無亦足下取友不遺之量所自至也

報周真陽

維夏得問未報斯置之耳何至不遠千里重使相勞乎  
三復尺牘深惟尚論不盡友天下士不已也乃知無數  
於不佞者有是哉前論屬某著述自見顧非其人而足  
下愛我以德夫復不淺博南既開千載得足下豈為非  
旦莫遇之也徐吳二君子海內大家並茲命世足下從  
游其間其在臭味則足下可知矣乃今而後於與有寵  
光

報周真陽

頃辱使者附藁上誠以海內之數君子足下身為屬吏  
而出諸門下有其二焉不佞不可不知也將斤削是求  
而重以布列不佞何所聞過乎版即竣尋為置之矣然  
斯其誼非不甚高乃即不無由是以藉妬口者不佞杜  
門八年於此即杜門八年於此一為足下嘗焉而莫  
我肯力豈獨其才不能私一令長哉仕固莫難於久之  
不厭而患乎其始易合也足下勉之矣不佞方奇疾經

今百日盛吏入視邸事又迫蒺粥氣稍充當圖所為灌  
縣公碑以報稱足下委命不淺耳

報歐楨伯

以余致觀楨伯則必褒然一國士也黎惟敬於不佞蓋  
嘗為信宿之好落落爾十年不遺一字書彼一時也量  
無以與進斯至今置之未為不厚也乃足下崛起嶺南  
論交海內不佞未嘗傾蓋望見顏色何以槩於心而三  
勤存問務得報而後已此其尚友自信不回豈彼悻悻



千牘之微可以計不朽一大事哉奚啻千里但足下已  
游子與明卿間則不佞夙昔與二三兄弟周旋中原者  
惟此氣類足下何患不佞之終無以效左右乎諭引請  
謁江湖之語誠不佞僻性不可遽移然謂門牆太高則  
吾豈敢又使少年盡夫倒屣楨伯何貴焉不佞所為不  
同郭有道而同一宏獎風流如此足下總角事黃公即  
清水自許誰能易之乃余所謂楨伯必褻然一國士也  
諸詩有格微辭兼到其白雪樓黃河中岳長陵陽翠師

子南內等篇尤為佳麗蓋恥為輕便專求與象正盛唐  
諸公擅美當年而足下所繇以羽翼二三兄弟者兩生  
有言不可使于鱗不知南海有歐生是矣惜也公實過  
化不見楨伯於今日則又不佞河山之感而願足下自  
愛不淺二詩寄答其一則前屬許右史失附者並上裁  
覽伏枕草草不備

報茂秦書

不佞在告杜門伏枕三年於此矣足下高誼乃能一介

存故人所辱新刻輒以檢列即不必致致之凡以為足下者意則至矣豈敢謂足下已老勿厚望之即示小詞取韻亦不妥能坐甘薄俗過我論詩不

與俞允文

曩辱仲蔚風期千里睠焉為平生之好云自元美得之不知不佞之有仲蔚得知元美為多也豈徒邴生薄遊有以當足下之心為知己即知足下於元美可矣佳章冲雅直有應徐之韻遺榮棄鄙議一往不復疑美人雖

云遠詎令歡愛攜颯颯乎其言之也中心藏之何日忘之然則嗣音契闊旦暮遇之矣惟足下憐察焉

報張幼于

不佞知幼于以元美哉自幼于可知耳再辱諭豈敢忘之顧翁行實諸君揄揚具是矣無弗得雋者而使不佞攘臂其間豈不難乎其為後乎然幼于與元美命也雖復蕪穢以藉諸君矣

與張幼于

久不聞問日以耿耿曩讀計書見居家伯季交等同輝  
為踴躍焉即知足下潛推大美將獨步千里也其惟二  
鳴編乎明珠在旁已慙形穢冠玉其上重使心勞不佞  
何以自免將無令觀者披華首簡而顏色自假耶即足  
下一顧力也先聲致人足下為我田僧起不淺况崔延  
伯並驅中原借長君為勝乎不佞蓋甚壯之

報俞仲蔚

仲蔚足下幸無恙閉關日勝自梁伯龍稱足下所以為

隱君子狀心未嘗一日不在五湖之間乃不佞朝野混迹耳孰與足下結髮山林之為獨行也元美兄弟得請計當大快敢聞左右庶知集蓼辛苦非一士之節矣其過而勞焉如不佞起居足下者

報俞允文

不佞承風執事蓋前高之重以梁君備狀起居比躅禽尚盛世逸民願執鞭矣私懷偃蹇敢謂氣類亦自一老諸生在田間耳即梁君豈無復焉華山圖生韻古淡展

帙如夢斯王安道可知豈獨先輩多賢新題悲壯雅與  
爭奇二幅已充庭矣謹附謝章取和諸以惟梁君

寄俞仲蔚

仲蔚海內此人耳屬乃天攷攣如牽復罔極埋孤自帝  
吾道沮沮所由聲氣相與倡和交應令之懸解非足下  
輩乎聞子與云足下故高隱即雖還往亦惟伏臘誠有  
意乎此人奚以其跡疏數哉

寄周公瑕

公瑕足下得非公瑾後乎何蘊藉如此四明薛生述足下者誼甚高謂少年不肯俛首舉子業即名日益起至使元美每致之及以介不佞此其於人不已重哉樓榜牙章古色飛動頗從游藝以示精真不佞願因元美交驩足下不間千里非槩無繇矣

與周公瑕

不佞承風公瑕惟日夜望見顏色不可得也重名遂未能自遜使海岱間有大雅遺音長者高躅各稱甚幸惠



然敝廬矣雖雞黍惡草然以延寵光構不朽一盛事尚  
亦有賴焉華陽一晤解袂千載將無亦云爾哉非劣不  
恭則蓄極而發未逮致情似畧云爾

報薛晨


文章翰墨造物所恡今時貴客側目此技甚矣吾黨自  
諱言之每得一士臭味苟同不啻骨肉維是與足下傾  
盖而故云足下垂四十載攻一藝窮神詣妙即枯管  
成精靈非其人誰則知之哉願足下自愛歸幸卒業羽

翼斯道徐子與以太安人誌銘見枉雖儼然在衰服之中為誦足下高誼若就見之足下能徃弔否三扁楷隸筆法兼長寵光草茅昭揭不朽文房諸惠可謂清貺敢不受賜捐金相致恐非行客所施於病夫今用附使完上

報梁伯龍

伯龍詞伯執事則優藝苑老也不佞田間一惰夫耳日乃儼然辱而臨焉何如其杖之杜乎蓋曰中心好之曷飲

食之僕之役在此章矣元美北行嗣奉聞問重以翰錦  
睠焉顧我者伯龍耶乃元美既得請一介相存不佞踊  
躍凡為吾黨與高茲役遂附以勞左右云



滄溟集卷二十八

欽定四庫全書

集部  
滄溟集  
卷三十九  
附錄

詳校官庶吉士臣柳邁祖

中書臣劉源溥覆勘

覆校官中書臣朱鈐

校對官中書臣嵇承志

謄錄舉人臣張元功

欽定四庫全書

滄溟集卷二十九

明 李攀龍 撰

書

與宗子相書

不佞近奏績書當已見報惟足下左右之一老吏安能為乎秋風且至東望愀然龍也奉職無狀大旱之後水蝗薦至雖某善卧一日為多方且首鼠牽於腐儒之見不欲為苟去以萬一人之憐我不已迂哉向所示徐君

云云者非敢自視大異不欲輒奪足下之愛次者慊慊為難耳今所有陳情乞骸骨而已仕宦四十郡守頭顱可知三年不調意同於棄奈何賸賸無所取材差強足下意又何恤焉

又

元美來亟謂子相出遇都門之外信宿而去蕭然各有江湖之氣也壯哉邢州太守奉職無似囹圄空虛一日治牘十日為布衣之飲齋閣海內旁若無人郡城之樓

不下百尺西望太行東望漳水北眺神京一瞬千里歸  
復雷雨乃歌黃榆諸篇以敵其勢則響振大陸秋色漂  
颯顏乎就醉遂極千載品物五子於中原右宗左徐哀  
吳郎之去國悼梁生之不祿是時也曾晷牧皮為未狂  
他豈暇論哉月晦興盡驪駒在道握手洺水之上黯淡  
不語某雖僻情旋亦自失也

又

既望廣宗尉持足下書來云當不日有嗣音明卿故吏

回邢州吏有事於宗伯各致數字豈不既已煩左右焉而愈益延佇永日不折腰道旁即高枕郡齋卧足下以爲非人哉老吏上某績屬足下省中僕泗固當繼至上乞歸疏足下省中則惟足下留意焉元美今安所期對髭鉗之士彼二人者則猶敕敕聞戒來已也奈何

與吳明卿書

元美書來亟言足下似欲據子相上游者乃足下亦自謂宗謝所不及而梁徐未遠過也明卿明卿亡賴哉三



子者不可謂非海內名家矣眇君子雖耄而繩墨猶存  
明卿今見其勝之爾即一日千里某何敢私諸二三兄  
弟乎子相復言某在郡作何狀豈猶不理茲多口日足  
下由邢襄間得為某甌吏者殊深何但元美干城吾道  
也

又

日不佞入計則足下傾身為某焉海內二三兄弟固無  
恙也握手中原悲歌相視旁若無人既彌月矣欲造物

不妬耶某於時固知當有一別如雨者於今日耳明卿  
哲士夫復何言某亦有浩然有東意明卿幸無患郡齋  
雖惡尚能具十日之酒天豈更相厄哉

又

明卿無恙某比歲伏枕之日半之既已拂衣業杜門一  
切謝絕客蕭然若未嘗有世上人者今彌年矣獨王生  
時時來不佞不得已強起為袒跣相醉耳春來殊憶明  
卿庶幾握手河山之間時事不必言即未嘗不已如言

者大率吾二人不如元美輩為能太骯髒於俗態而已  
咄咄明卿奈何不忍一日之不宴而偃蹇自遠重令放  
為豈所謂焉往而不三黜即三黜又奈明卿何

又

所為勞元美於家難者僕日夜望足下與俱耳兗州書  
至令某投袂而起屨及於室皇策及於寢門之外車及  
於鞍山之麓矣客乃言有白眼君子者從楚來檄郡大  
夫稱故給事中與吳按察大醉狂歌泗水之上指顧甚

異當是精物信宿發矣丈人勿自苦也已乃開槭讀明卿寄章寥歷怏懣有脊鵠之心於元美者豈必繫之馬哉浹辰而廣川吏復致足下嗣音知己在九河間竟不肯淹於吾地此一時也足下乃在酒人傍乎雖元美亦當自竒耳然勿更言子相使我二三兄弟酸鼻矣便可示挽章吳峻伯頗見傾注徐君亦誦足下無窮

與余德甫書

不佞杜門伏枕五年於此其於諸君子斯置之耳安敢

謂有一再存問如足下者廣川書方捧檄道次使命未  
敷首及故人林君之東復無他屬肫肫病客如就語焉  
不佞如某何以得此於伯兄而何敢忘之無亦虞翻所  
云天下一人知己者足以不恨也天下皆以長兄不締  
膺仕為高而尤以不遺狂生為美閩中信樂安得三年  
淹也子相已為異物足下以骨肉為治後事海內二三  
故人莫不悲感於大誼謂可以觀交情今不識其刻文  
已為刊其所忌諱而後布之否故人陵替惟足下自愛

節鉞一方建幟多士卒為二三故人蕩滌此意不淺

又

豈其然乎余聞之足下有毀傷薪木之警何天重困吾  
黨也不佞不淑乃歲七月為駒也母者竟以不起匍匐  
裹事為憊已極不佞魯之狂士一旦儼然衰服驅之人  
禮之中杜門十年忽睹弔客會葬僕僕四視如處女閨  
戶矣乃知莊叟鼓缶亦哀吾生之常勤耳郭使君古之  
遺愛郡百姓之視其去如免赤子於懷至乃有此豈獲

乎上他有道耶即仕宦之難何恨德甫之不理愈白矣  
元美杪秋得請使寄白苧今以篚足下焉外律奉憶敢  
并及之間者殊闊勉之嗣音

又

自為報閩中且三數載不得聞問契闊可知王中舍至  
始得足下不理於口狀而素產蕭索將若不能俯仰意  
殊不堪三復大篇變然無一凡語乃知足下自有所事  
不著常情即所可欲不遑暇顧今無論足下心迹山川

勿舍行將夙夜即由是置之立言當世作不朽一大業  
無不可者豈其吾輩厄此百六遂爾蕩然進退維谷必  
不然矣而後乃令二三兄弟千里比肩守望相助德音  
不患孔膠耳某十年杜門於此何嘗坐自悶而令色萎  
黃惟是德甫稱同調哉自愛自愛江上雜咏吐哈老莊  
擁帙閒居超然人道足下庶幾無疾病何愉快至此極  
也

又



得王將軍所寄詩讀之即報元美曰余德甫晚成七言律乃有其勢雖氣未備生惡可已小美之下將其人焉小美敬美耳又報子與德甫七言律乃有其勢無已終當自詣為大江以西一人其於吾道所樹不淺矣不佞所游元美徐吳外德甫也業已自致獻吉時則若熊侍御者自今視之豈當德甫於吾世耶謝茂秦見懷五言視昔故不較乃李伯承亦以疏歸尋惠刻稿其在吾黨雖有臭味然落落耳德甫務工七言律當作俱胝三行

呪不啻大江以西一人功名一長物也德甫實繁有指乎小兒豚犬也叔父何自念之

又

郭使君旋所附聞問者當具是矣亡妻襄事則之官遇王將軍於途得足下起居畧不知郭使君聞問未達也歲十二月乃渡江與元美兄弟雄飲姑蘇三日夜逼除以抵任出謁無常時三月至自攝海四月以子與盤桓西湖之上凡再浹旬而別五月分藩命下而王將軍所

寓足下書始從濟南來明卿已移高州六月以賀東宮  
行暫詣元美兄弟視之九月朔抵都門初三日旦入見  
帝是役也凡再浹旬而竣亦與子與凡在浹旬而別元  
美兄弟所抵大名抵金陵皆以前月也十月抵濟南且  
抵浙圖所以報足下則十二月河南之命又下元美與  
為代焉元美正月自大名亦詣濟南視不佞不佞與雄  
飲一鼓而盡一石矣蓋二年也二月抵河南日夜與殿  
卿緬縷不能已三月得子與抵武昌書云明卿抵高州

則不佞抵河南之月也是役也與子與周旋浹旬者再  
與元美相詣雄飲者三與殿卿日夜緬縷者無常時得  
明卿起居不佞者一得子與所致明卿起居者亦一則  
是二三兄弟雖老相望中原猶可春秋耀吾鞭弭取為  
快也左提右攜惟德甫是求而湏臾忘之哉四月以至  
六月太夫人含錫弄孫不佞始就筆研乃圖所以報足  
下者如此矣為致用晦菴林真鬱令之諸王孫掇躡有  
之貴倨耳誰當告者足下與明卿用用晦乎亦用晦能

用二君子耳今不但其詩之體裁具是即尺牘矯矯不作近語則人之不可無嚮往也如此足下其列之吾黨離合之間為道不遠於不佞何有哉千里慕義在昔難之是足下與明卿之尚友也郭使君幸無恙駒兒豚犬耳裒然使冠多士何以稱有造之私然亦一吾黨之伯樂矣

與許殿卿

某抵東居且二月日夜望殿卿來甚急而意不能待愈

成契閣殿卿殿卿萬里生還不當日鼓飲樂耶洪使君  
力疾視事又安在哉人苦不知足初某守鉅鹿時又焉  
知有三秦之役也徒謂以他遷行為不苟去爾栖栖入  
關乃日夜與二三孺子妄緝蘆而處等於幕燕一行校  
閱帖括成山精神既疲披詠漸廢何為者乎安得與殿卿  
縮秣嚼苦驩然道故握手景陽之濱以弄白雲元美天  
下才也然願一當某久矣兄其為我職志

又

不佞杜門六年於此矣所為朝夕周旋者殿卿一人耳  
向以諸除輒失其偶嗒焉何如奉檄而東尋好彌月益  
重為別更展朝夕締將不解不佞與俱矣既西復以么  
麼之忌遂缺祖道是豈為施於殿卿蓋至今遺憾無已  
時而諭已四至無論市馬之故假質未集以成不佞不  
達事體之誚即其揭示妙理以持不逮如云作意求適  
已成勞擾實足下自天夙悟鄙何敢辱焉獨以非習自  
墮汗漫乃今且在求不求適不適之間庶乎境變神遷

耳小人易緣老兵易得誰吾不可與把苦吾誰不可與把苦也酣法難雅口鑒難精誰吾與把苦吾誰與把苦耶么麼一言易解者猶尚妄議自引其諸微辭恍忽感動將在曲削始祛羣疑矣拙集出於客歲不佞取刻本校之酷加刪易凡什之二閱月而發即佳序亦為正一二字剗補會就想不日有定本極知無一可傳尋當中廢但以備檢可諱語不至貽指摘者一以成魏使君之盛心一以用籍佳序云爾前月使君用幣正夫中贊更



為乞佳序一篇並乞殷集一梓此兄謙密其集恐未可  
猝發然豈為故人重一序此實某乘間言之使君者殿  
卿以為何如元美書云昨見吳中張仲子為我二人刊  
所倡和詩若干篇似亦興起於海右集者但海右集訛  
甚至不可讀兼復逸而莫備拙集既達可續翻對以終  
此意邵武使君亦翻子相集而序以元美海內知名士  
輩出矣魏更徵拙文將並付梓不惟多取亦重羣疑奈  
何奈何非毀卿一校不可夫士之所寧無友也而友必

以知己者非知之難而處其知之難也若相絀於嫌而令不得任其所便豈為知己焉殿卿乃今所事固自謂得主其左史又可與浮沉即受簡賓客已稱清樂况撫愛子擁少妾吏隱王門而人不測其所愉快哉信乎得以儉樸矯之大示中流之望不然何必去父母之邦諺云何知仁義已享其利者為有德諸君故自灰視不佞謂不復然遂擯之耳中贊君方烈炎火諸君何畏焉所得侍郭君者矯志難與談且間出別業無值時襲君亦

但問奇語方冊往迹日月至焉耳渾源使君一疾幾廢  
今亦未能往祖之即田間亦復却埽侯氏子已屬他人  
劉生徒食客無與城中事即有言中贊君者何從而聞  
之便為促序更屬白雪樓記并詩一章不然不佞必數  
譴責之玉堂之署足下為以何解虎近用餽每御之令  
人着意遂不欲遣候以酒頗佳別來日復潦倒獨魏使  
君為海溫烏他猶是未敢自獻不知元美何謂見客談  
于鱗近事有感豈舊學憲恚我不納而云云即足下亦

何所聞也元美輒問足下游梁狀頃附子與書使且旋  
如肯就調當抵歷報清河之後時則再達足下不晚長  
君居守屢暇蓬蒿修儀精緝推誼為多新示中贊君文  
妙甚不佞何幸托諸其側所云父老上白孝狀深得中  
贊意矣我朝諸公選可七八十首亦未妥愜適未攜至  
城中容與拙刻剛上彼中文獻地雅有藏本不憚訪錄  
以備當代之音近詩二紙間有古體可采今呈欲令殿  
卿知我輩不徧觀百代悉索諸家斯無以集大成聲金

振玉耳雖然其中非爾力也則所望於知己者哉必以  
強人於懸解大笑之矣新刻尤有難言殿卿幸為我黨  
職志乎清酒百壺用報佳疏之賜暇為諸宗室中求一  
痔漏禁方并前所許藥二種見致乃懇懇者白雪樓記  
及七言律何可無我殿卿外馬值七星附償即太久又  
不敢具子錢

又

毅哉其能削梯成集如此然終自訛缺如少年行題雖

刪而詩未易不肯更查白雪樓稿耳今寄改本一冊幸  
依所塗注刊補頃刻事就何憚不留意也續集姑不暇  
檢不佞稍窺文章未達佛理見謂為二足下大方兼詣  
並妙見謂文章莫非佛理何不可哉適姑蘇梁生以元  
美書至出卮言以示大較俊語辯博未敢大書英雄欺  
人所評當代諸家語如鼓吹堪以捧腹矣梁生亦致元  
美書足下并卮言云且付長君生今東探海市計南旋  
足下恐不及作問辟之相馬觀其發跡汗血之駿若無

意焉其於千里駑駘承御非不砥蹠振鬣而龜勉踰舍  
絕銜敝策步驟自失無他力有可極不可極無關齒盛  
衰也茂秦之於詩不佞固知其有今日矣

又

不佞為疾適令百日以庇再造猶在牀薦雖宿創頓失  
似有因禍為福之慶亦恐暴弱之餘未易以復其平生  
然辛楚備嘗庶日委日熟矣天幸之遺不敢自謂為人  
間世而諸君亦宜勿更以人間世視某者奈何謂從諸

生比文角藝乎夫好比文角藝者出於妬妬出於不自  
信龍也其妄自信奚啻先告子不動心毀卿愛我慮有  
口事傷杜門之義即不佞亦懲此子善洩其與往來直  
欲不窮其交而已無所深言諸刻拙稿咸屬倉卒然此  
兒行何必易令題以浩蕩行可如原冊以從軍公燕詩  
他集未具姑寄元美昔在正月之二十一日豈復謂更  
值覽揆之辰而乃覩兄八詩之盛於指掌今猶記屬駒  
乞兄狀而因誌於殷時戚戚焉其不為感舊之音天幸



之遺乎近示詩文統詣妙境迹藏於思可與知微日長  
君臨候謂不佞凡病之有形氣實客之氣理斯形乎竟  
如其論此其卓識非毀卿不得而予何患不至道也久  
謝客客輒謂不佞託疾耳今已身抵京干諸貴人且起  
矣曰已抵汴身為質子錢於右史矣此不與一二老腐  
儒左攜榼右提局如毀卿之於孟生指庭前栢樹子道  
故又但曰喫茶去耶生實不德乃至親日偵其肥瘠况  
人間世哉藥物紗扇惠及老母并謝不次

又

自兄西不復聞妙語今安得曰道可忘而得生有待而失必令吾神於道合而已不自知乃為得也微哉海內一人而已矣近作松聲似帶秦時雨等句益登神品夢聽琵琶前二句亦自新奇極知足下玄理高妙土苴詞華然業已傳布乃生為足下不欲示人以樸云爾

又

不佞所不貽一字書正甫者獨以有今日海岱之間我

三人者豈其又一氣類而敢自菲淺其或迹微有之要  
無害天合即毀卿日夜從中調燮固亦因其氣類合一  
之天已爾寧能強非其黨某實無他腸即不有今日我  
三人者必全之交也但為云尚蚤姑竣正甫秉鈞之秋  
使某得以有人乎穆公之側然後徐為邴生薄遊之計  
攜我毀卿東歸箕顓老焉以觀稷契之美不愈於陽鱈  
之誚耶昨元美兄弟入理亦漫及此南還得請便詣晤  
言安得并與毀卿握手一堂之上春來寥僻援琴自愛

渾源有言不佞兩為大邑擢郡太守號二千石不如陳  
道鳴提一藥囊乃置十金小妾日侍卮酒何謂非薄祿  
相也為喻雖鄙足徵其不獲為樂於當年蔡姬勉作解  
事為遣一姬進一姬各厭余意但依疾為命每以先君  
子棄館舍為歎涕輒下殊相視悲焉乃知毀卿所示寄  
故伎三章慘於垓下之歌矣

又

小豚犬老夫爾耳乃辱祿佩之寵愛我哉松霞之祥又

何可當惟是日夜祝諸姬安得就館為足下更產一男  
子使豚犬在兄弟行益延世講乎河嵩之英取用宏多  
矣向謂李伯承忌不與我為天門日觀之游今則果然  
元美亦未至魚蔬之惠姑領俟之襲生書生勢自依依  
不失為故足下何慮焉卒恐上書之念未已不甘一貧  
博士奈何近數過我手談相命不及時事豈不佞因而  
學之耶新篇殊覺道上神明垂應但足下妙悟求似即  
止不肯由所不似以致其似為遽有所隔乎正甫方獲

主器而聞政不寧賀者在堂弔者在門每有良朋况也  
永歎不佞適讀薦章知足下以其人相為力不淺也不  
然豈其自棄十年於茲公朝大舉諫臣斷斷不佞如某  
一抱臬吏者滿天下獨安得濫與二十人之列必不然  
矣即使其奏終寢尚可一吐吾黨之氣不謂殿卿取非  
其友也不亦一快哉老嫂長君亟於豚犬有餉并報附  
謝

又

病後性愈狎野每一抵家事出理外如觸籠之鳥矣兄  
大積勞以承貽典黃金橫帶文章清寵馳騁諸王之門  
游梁信自樂乎亡孫後黯然無狀杯牘浸廢乃以琴自  
遣耳杜青州近饋一牀及弟所蓄似足不徹道家所貴  
得意忘羈尋且置之矣市價不定兄姑返焉仲月子與  
一介相存浹旬元美寄致甘毳均之拳拳我毀卿咸去  
數相聞也元美病瘍敬美云斯人斯疾今率當遄已吳  
峻伯寄歲編三十餘卷曰公試覽此當何以從于鱗元

美子與之後殿卿以為是何言與新什於初冬客思尤  
妙為宗周氣業師筭字當易諸賜精奇俱徵注念再頒  
藥餌尤軫扶衰歲杪興言懷人覩物想兄忉怛同之蘇  
子卿有云我有一尊酒欲以贈遠人凡三品五盛以付  
屬車至可呼羣姬牛飲把酒當御謹伺入我牀下者灌  
將軍罵座此豈為罵帳耶

又

夫玩世之為大於辟世也邈矣不佞弟僻才似可足



辟世耳自視無長兄之通才將何以出而玩世耶此公  
為吾輩乃如此然某自視則昭昭十年一病夫傲惰無  
狀一朝與大廷薦列謬竊國寵尋以為且置焉而有今  
命即有道如長兄者知亦為弟踴躍矣是役也可以期  
月無大過不負翦袞之雅然後更圖作邴生計以報諸  
公者恒於斯也十年恬退微名不當人意一朝失之而  
辱翦袞者亦恒於斯也兄而為不佞願之乎雖然亦患  
有道不如長兄耳苟惟其適十年微名亦何用哉即一

朝失之是亦遣累尤為光塵俱妙但弟有難言姑試暮  
月終當以辟作青如秦中故態者兄幸識焉此外惟冀  
三河間一握手足下庶幾少忍云爾浙牒已下濡滯不  
果豈恤微名畏繁以勞半途而廢取笑里閭也今月二  
十日當南發此恐不待褰帷而悔奈何長嫂長君稠疊  
出餞不肖駒又辱子長復締新好徼惠長兄殊無已時  
亡妻以來再捐產畝信乎貢禹賣瑯琊之田而赴彈冠  
之會非妄也盛貺及期暫免稱貸矣

又

南發無任硜硜半途之狀。黽勉抵浙，百遘初心，業已失計。尋復自解，顧我長君前，知不佞之不堪此而不言也。終恐故態當作，貽我鄉曲，忽起忽罷，狂妄人耳。所惟其適，即并其名實而棄之，何恤焉？勞形則敝，道力忍性則闕，道氣不佞某巖穴，既不能深川澤，又不能廣絕物哉。獨念平生，毀卿知我可與言，乃不佞所值，凡多無其理者之事。即雖神明用必其知我也，誠皆無其理者之事。

言之誰信之耶所求三河間一握手庶有披豁欲殿卿  
信我不必其理斯白首知我愈盡耳逼除視政似在驛  
傳既竣閫署尋攝海道莫春旋省乃得晦日邸報陪叅  
江西本自菲才自宜常格見處且為當路乍記乍忘援  
止而止甚足以成不佞不恭之趣而混薄游之跡轉相  
便也殿卿為我願之乎姑蘇與元美兄弟及諸名士雄  
飲一日夜而渡江之興殆盡予與數相遣候致期而不  
虞妨之今猶咫尺千里所謂三河間一握手均之天不

假之也然子與蠲吉屬且謁選計欲方舟北過元美擊楫中流以逌明卿詣廣陵宗生墓下醺酒為別似千古一勝會然後間出大梁攜我殿卿登平臺弔鄒枚與相如把苦相勞駕言趨歷拜太夫人堂上稱觥為壽再遊王舍城之野杜門高枕彈琴散帙種秫在庾半醉袒跣含飴而弄少子以竣殿卿之有意焉歸逸二老於當年豈不天之道而善學猶龍者哉子長貴人壻今大捷矣殿卿固自一快而豚犬駒三附雷陳百折不置蓋素奇

之迫行致締以遂前好識料可賞不然且當新命嫌於  
閥閱子長即不棄舊德如駒何浙中炊玉薪桂廩庖疏  
冷衣冠禪理雅相晉接澹情之勝致玩世之妙理也某  
不佞乃處名下年少自喜窺人即稍墮落彼其謂我何  
十年寂寞作苦今倒行逆施耶始知長兄陸沈王門招  
搖一世者不動焉而已俛去俛留如不佞未免滯乎其  
形矣老嫂屈尊出祖推愛非常賞鑒嬰姪如躬襁抱可  
謂難也適致問長君不佞僻拙里閭所棄獨辱貴門謬

與世講遂令某因親不失其置其餘云

又

聞之使附啓乞狀當再抵覽凡奉先後二致書慰勞周至者且諭貴體日佳自幸仰託未艾矣何得衣被小豚犬襁抱中蔡老妾少識鄙意廬亦樸惠可借相安舉以命僕不敢當焉皆曰姑逝倉卒脫棺收視不報之德世締伊始矣適又袁生書云權禮以時與戚寧易有味乎其言之也無論九歲之孤顧惟寡母即人情凶薄亦何

所不可流涕者任之耳徒戚何益然而無財不可以為  
悅即易亦難奈之何又云襄事無以誌為解是即前所  
教以仍先大夫舊壙云者不佞豈忘逢於何捫心齊王  
之門若使貴公逗留搖筆不下斯置之矣某於此苦塊  
慘惡寢伏僵攣甚不便於倚次誠如諭者長兄愛我哉  
子長信奇士即長君亦各執其所自見者耳毀卿見以  
為不為宗周孫為非乎即毀卿之為宗周孫長君見亦  
未盡以為是也新憲長晤語無不起居足下者足下書



已面屬之往當酬唱相存矣詩多麗句今錄以聞聶都  
使請文臨繹其作古潔殊類不佞當自一名家毀卿物  
色使在帷幄三益不淺萬無失此索所藏藁為寄以觀  
其備裁之

又

生非為恭者吾黨有人哉兄遽何謂而必圖之以孤鄙  
薄見所宜緩更隱王門不惡也倚次鬱鬱視日猶年賴  
小于鱗孩提旦夕耳心境拂戾不可言晨有自宗伯所

來者云誌已就藁望後可得報果爾孤無異悲感於殿  
卿者便為轉謝否所託大篇懇惠以梓無任徼寵跂予  
不備

又

宗伯誌奉覽簡潔老成亦自名品使早得佳篇狀外之  
助不啻此矣刻本已就方竣佳篇浹旬可緝寄不意長  
兄為某一租客歲賦布二十綿四百坐享挾纊之利不  
知所由至恐成冒昧積負不責矣日月不居先慈見背

忽已卒哭念別長者視此濶焉駟誕歸集佳文適從天下父子奉泣如復得一母者先慈獲據成棺再叨狀列身與名孰親是均不朽其在殿卿厚自性生不難於為德值所可為德者為難耳何以萬一圖報也佳篇語意一庇不佞而辭足以發然恐累殿卿不黨之名而信者半之矣廬次黯然䟽始自慰夙夜念襄大事一切廢置即一二妄動取侮亦先慈餘譴耳之告子之道力時可竊用頑鈍不恤也長者匍匐豈猶有所不至而重蠲吉

惠示使之慮出萬全即某所自盡何以越是乃宗伯公  
即已託羅武選為擇十一月二十八日蓋以荒隴坐向  
先慈并愚父子年命生亡所忌取衷之者似與灌甫所  
為擇者不同又其月日既已登刻請益長君亦為抵掌  
武選今恐互違教旨奈何毀卿為命之矣今之作者非  
李生王殷二三君子則毀卿其人耳聞之莫章始猶謂  
海內安得有此其人也者乎於子長亦謂家丈人平生作  
文自一色象此則玄焉恐非其手不知色象與玄文之

所自適耳正恐毀卿傷玄何患色象也乃毀卿近所著  
述誠異平生無怪乎子長刮目矣不佞與毀卿老矣所  
願杖屨夙夜無相逢也初擬以白雪樓為贈不佞營白  
泉而比鄰焉恐倫有別業猝未他委至今未敢獻左契  
詩曰十畝之間與子旋分吉媿弱息未可窮谷無已則  
稱東郭二先生云爾此非就謀遙度不可王憲伯未行  
求所以晉接長兄之者體貌曲備矣猶謂不佞不源源  
豈可以不造諸公為解且不佞亦已推轂灌甫又當自

悉也

又

不肖孤之於毀卿可謂成言乎友也弱冠狎之老而益信難矣哉即晚締大誼何加焉且孤動以天幸即先母大事亦復倨彊毀卿從旁贊之無不各中條理使孤思而得之無不以為計所必出而後善者自今觀之老母大事什已舉其七八則以值毀卿不值耳是非動以天幸哉乃知友以人合未為通論也十五日渡河出境十

六日至曹州阻雨二十日過濮由東昌二十五日抵濟  
南權厝伊方鞅掌哽咽不宣

滄溟集卷二十九



欽定四庫全書

滄溟集卷三十

明 李攀龍 撰

書

與徐子與

以不佞觀於子與不有今日何以著齟齬之効也然其  
技止於解郡而惜我者亦已隨之今不出彼將謂我何  
何所不屑而自惕如此即太夫人何以自安一二兄弟  
實諧所請惟足下辱為裁焉日再奉諭圖所起居未就

拙刻亦復宿謝子與庶幾無疾病即如明卿已事浮沉  
人間何不可者而悻悻為即何得使不佞望見顏色如  
曩在清河舟中時也

又

君家大人違養某至不能為一介絮酒之使二三兄弟  
奈何奇狀驚人凡再辱諭深念種種天不憖遺何論殄  
瘁非我子與縷縷誠無以聞高枕前稽紹故自不孤廣  
陵生多情豈今有屬於襁抱明卿危就世網翩翩自在

所美佯狂欲離欲合如阮嗣宗者一子與耳久擬一晤  
託言千古

又

得閏月書讀幾遊岱宗之語駭勃久之若即就視不能  
奮飛方念南海廣陵二君子即夜何堪更得此於子與  
蓋余至今尚病悸云及覩白雪樓二章又翩翩有逍遙  
垂天之度快哉快哉向謬計足下出處不獨以伯母即  
亦子與所能信者一時同好交臂匏繫將謂我輩何吳

生栖栖一郡豈遽為非哉足下高識妙悟夙昔帝衷何  
綏解官如綏解官不能於解官矣病愈之悟悟豈曰委  
處何見為委出何見不為委耶此余所謂吳生栖栖一  
郡未遽為非也伯母內行大儀南國攀龍敢不樂聞老  
母明年歲復七十正自借乞答篇矣陶羅山銜恩足下  
輒拓關稱謝述德備至至使真陽令三使致書使竊幣  
道亡而再致之竟取報而後止足下感人此一何深屬  
吏如二令郡百姓可知固始公所傾身激烈百口為誓

者豈其心能自己乎僕村居即數月不入城市伏臘詣  
老母稱壽即順甫亦數月一晤數語為別耳終當為足  
下酬固始公高誼不淺也所示新作朱紱誰無恙孤臣  
去國之音世情回首盡達生齊物之旨遠哉戚戚我心  
元美殊賴慰藉推與敬美蓋亦為之惠連以慰藉之然  
此美故自臭味即吾黨後賢亦所慰藉矣今復何狀間  
者濶焉久不聞問不佞業已自棄則有抱影槁立耳終  
不能復在貴客意氣中

又

不佞所輒為誌銘蓋解衰服辱故人之迹至無以標秉  
當世反湮太夫人懿德罪豈獨子與哉置之惠亦不但  
不佞也先伯承致書梁周二子具悉足下在疚狀元美  
亦云子與立壁如長卿滿座作文舉念其貧不欲恩之  
朝擊鮮亦夕歸矣二子者亦拳拳不佞為請然足下業  
已過厚安之曷害焉顧二子亦雅能忠告以子與長者  
重為躁耳日茂秦寄詩見懷及伯承所貽新刻並多出

入畔我族類子與固云文章老自知乃兩君既種種可  
以其文章知之矣余德甫七言近體頗工於勢無已終  
當自詣將為大江以西一人今湏子與元美時時獎掖  
相成羽翼吾道所樹不淺集佳把玩日不去手間有所  
効勿恤狂瞽不亟達者難其郵云前選詩目槩未精懼  
十刪其五庶幾近之

又

太夫人以子與乃當大事今幸已竣他無不可自致也

通家猶子竟不得一執紼而授褐老母愧則可知為別  
忽復彌歲矣雨雪黯然遂成千載向攜周生把苦三胡  
桃樹下道及子與纏綿轆轤前渴心如火子與為亦不  
忘耶佳集壁上中多不可易之聯不可得之語寵光吾  
黨鏗鏘異代不佞賴焉即元美所云斟酌二子殊有味  
乎斯言而曰精思便達似有子與所少今觀丙寅稿數  
章已詣境地何以更竢精思蓋詩之難正惟境地不可  
至耳至其境地矣精思安在哉十二團營一軍吏領神



機諸部七劑相載聲聞百里此何故氣欲實也精思非  
氣所為乎此固元美養氣之學而以望諸子與子與誠  
能盡所為集以積精蓄思一朝自至併其境地俱泯然  
後乃今命不佞以末簡之役俾不佞得以其所至為叙  
揄揚明德庶幾稱効將視元美明卿橐鞬中原職志不  
淺不然今集故已絕塵當世膾炙士口不必更造顧所  
竢方來英雄窺人尚為一間不獲我心非兄弟不朽大  
計也不佞一讀丙寅稿不勝踴躍晚成大器始敢諄諄

期月作苦實謂子與必至無疑耳為問元美瘍何狀斯人斯疾孰與遊諸洞天樂也顧大司冠狀宛暢周洽史斷核然元美取材子與縱橫自是可致覽向約李伯承暮春者我二人於日觀之上賦相遇也其人嫋嫋自愛茂恐三舍引避安能顧草廬又殿卿報謝茂秦近狀曳裾潘王門擁一老伎故趙女居常千金裝自快是為詩市也此自小馮君先容正惟牛頭未見四祖時耳今安得此老伎為元美抓瘍痂矣

又

七月既望始從顧生所奉足下去歲書輒具答付寒溫不以時間奈何元美通章色動聖主今既得請凡在吾黨與賢此舉惟子與幸過而勞焉便道咫尺不果見枉不佞非人哉引領三諾竟忍負之縹緲一信益增悵悵握手前期不復可知矣而後乃今念足下三宿白雪樓中以成萬古奇會誼則甚高然元美似有畏途之阻士之處世無以効哀憐之交難哉諭云邵武有薊薊之者子

與無害也余蓋嘗慕足下大雅明哲之德遜以出之矣  
為有味乎元美其言之也便附起居屬有匍匐之役不  
次不宣

又

抵鄞之夕元美一介之使奉書至矣篚厥盈庭用託先  
司馬不朽之役不知不佞日判五百牘哺不及吐也四  
詩調笑小美亦復二章并以附覽天上客星聊作使不  
當如是耶中原紫氣正與子與卧龍之句頡頏作已云

云知有今日明不諛耳小美去住青山者自由殊合邴  
生之旨即為諷不恤焉足下熊羆之喜不佞已徵元美  
稱文為賀會攜至中達握手一醉子與乃効東道主亦  
吾輩天下盛事寧無努力乎大美用小美為陽鱈魚遠  
以二十一日謁選欲因塞望不知終當不免矣郡博士  
周君云得明卿京邸報待調良苦元美海錯二甌轉聞  
從者取答不次

又

正月痔乃作奇徂夏始愈不佞平生善臥是稱病隱造化其奈我何但為狀惡至今猶能令聞者悸斯岌岌乎可知元美為足下勸起實獲此心今所欲於足下者從事而勿失時為貴於智也公車一月可請除即奉檄南枉從容道故豈為晚哉

又

吾黨漂搖見復種種深念足下隱約無時乃使者忽以遷聞兼期晤寫不佞懷絨踴躍計日為驩即命滑蠲庖

婦子從史亡何足下至矣則儼然在衰服之中使某駭  
愕四視慰勞不能成辭顧暫奪哀悰歎及病狀諸雖黯  
淡而一夕千載鮑山為烈代有其人樓之取名懸合氣  
調數非偶然王長君而後何可使子與無楚然之音獨  
以太夫人隱痛某自宜絮酒千里不然出弔於塗二者  
坐廢而居然辱駕倉卒南奔不得仰効鷄黍之忱盡請  
益之雅則不佞所疑天厭之人事多中阻似不安也虛  
城之別非敢恣然足下高情有携必戀既已迂枉又令

不得窮日之力豈所望故人永錫之義乎斯不難於足  
下難於受者誌銘之委遂敢承之凡以釋群疑使泯然  
不見有異常之迹耳謗書姑置之是矣久以伏枕廢業  
慙茲大文乃某與有猶母之分不得以作者自嫌終當  
削擲必無傷足下之明諸所面託謹以極愚幼于一書  
並希檢發獨佳集一部正欲留質明詩刪蕪足下為辭  
多詣神品非假日月其奧難窺文集亦卒難錄統容獻  
春便寄再求鑒賞明珠尺璧在已猶在人何慮什襲焉



使者滯於轍中薄晦始返恐勞延佇詰朝紙發元美前  
云拙稿尚有可留者失之集中或存之苑紙可屬錄示  
明詩刪姑無令出尤懇大事方殷百惟自愛

又

不佞種種改元二月又舉一豚犬孩提盈抱子與可知  
矣元美再致書必欲一顧病夫草廬之中然尚守闕祇  
俟勘覆得請而旋期難豫定是以以外公朝大薦元美  
已為褒然稱首令吾黨吐氣其通章以列寃狀者凜凜

乎其文議臣動色特揭巖廊傳誦高義小美例自得除  
兄弟並起夙憤豁然唯是聖政方新風雲之會子與及  
禪勿復濡滯明卿即落落以卜有鄰何慮乎瑞室詩甚  
佳如履平韻是老筆耳

又

文章大業是以君子欲及時也顧文章自有其時有欲  
焉而不及之者子與所謂文章老自知是也佳集不敢  
以留則足下時至矣期月作苦以遺二三知己千載一

快許殿卿海右集屬灌甫中尉為序不佞嘗欲畀諸炎  
火乃周公瑕亦曰是既已不能禁其傳然不可以欺智  
者亦唯任之今以子與視殿卿為竣灌甫乎嗚呼不獨  
其驥即蠅亦難子與奚樂百世之下謂不佞執鞭子與  
邪竟貽左史詩云云矣

又

不佞巖穴不深自取侮予小草渡江不勝故態復作之  
甚所幸子與禪而謁選之期近矣圖當方舟北返徵元

美輩震澤之濱坐一大壇場擐旗中原去矣是役也不  
佞於出處之間似亦率爾然一失計之窮交也元美乃  
信宿自愛不知不佞南發之始已量所効于二三兄弟  
者固以此舉焉而匪久為栖栖也抵任奔走無暇時即  
未嘗頃刻忘薜荔園一握手札橐夙具冀有他請偕報  
而使者儼然臨貺矣以一病客坐更新歲慰藉何如敬  
美欲復作達飛揚自喜維夏尋且謁選再窺元美感述  
諸公之意亦恐卒不能堅卧豈不人各有志然且巢阿

閣暮翔千仞當與不佞同之不佞以足下寵靈自恃犬  
馬之齒尚堪善後顧止於遂初而已輒起輒罷何害焉  
此某不自知其不可者敢布腹心夫玩世之難於辟世  
也百倍則不佞黽勉自苦矣偶有他請二月當詣貴郡  
樞衣孺子之堂薄觀二姬將就館者垂腴溢幅明珠映  
媚豈不四海一快耶老母以弟婦之變而豚犬駒以妻  
病未遑即養不佞携一小于鱗呱呱掌上與老妾蔡張  
燭華屏正席珍品斗酒相勞歌風雲一日卧龍來之句

愀然借色於文章寧能羈旅自悲也寄于鱗起家浙憲  
二章大自格氣非明卿所及矣有是哉大器晚成者乎  
元美亦云邵武近臺輒不振至乃阿黨峻伯以畔正始  
豈其才之罪乎佳篇荅江都歐文學以下如篋裡夜光  
等語非元美不能也足下必自駭之何由而駭造此無  
亦文章老自神乎吳越一撮土乃有兩生奉一不佞並  
立中原比肩千載圖盛事者邪許殿卿促不佞之官甚  
力唯恐不佞不一渡江與兩生者周旋鞭弭也昔在貢

禹賣田以赴彈冠之會未聞王陽為出黃金裝其橐中  
乃左史餽贍盈鎰為難矣且念足下不置足下其獎借  
之勿以謂非大誼所關而惜片楮即金紫新貴或可惠  
以贈章尤過望云

又

曩者西鄙吏行為致草草踰日文成魏使君乃有一介  
於汝上以不聞命失附候音非敢湏臾忘所有請於左  
右也田家作苦既已餘場與許史為南山十日之遊歸

而值一户曹從河南來者言足下守汝上狀自謂三載  
郡理官未嘗見治行第一蚤有如足下者不佞也愉快  
可知矣及即又稍述明卿被構俛不免者是安得有此  
此何以稱焉而重以量移快快去海內二三兄弟且盡  
矣一楚狂又何能為奚不聽之然後知足下龍蟠之德  
不可及而天意慙遺者獨至為二三兄弟間執它口豈  
其微哉何公祠記雄辨千古三仁四科大義卓然即所  
論業已見撤無復返理足令仲默凜凜有生氣實獲我



心所謂知其說者之於天下視諸掌乎即不數月而治  
行第一奚怪焉

荅子與

異日者携許生逐兔盼子城下掠草而射之不覺鼻頭  
出火耳後生風扯脯而食醉見大介遂西走馬秉燭使  
君之灘雄飲相視扣舷賦詩撰思道故中夜忼慨拊髀  
於五子復亦不覺髮上指冠意氣交作矣十年之別不  
可無一晤言如此不佞則為五子者為使君非直為使

君也曙發更抵右史之廬散帙揮染戀戀可知踰日乘  
雪復與右史載酒岱陰諸山谷間栖息諸寺試嘗名理  
歸臥東村掩關藥物除夕悠悠蔬粥自愛五尺一童子  
炙被而已是時也不知使君左擁吳娃右抱燕姬與彼  
海濱遺戕蓼莪藐焉之二孤泣血相對狀復何似也謝  
中丞苦愛佳篇三使人索之不佞為檢百章今所緝采  
亡慮數十不佞狂僭間易片語勿罪後聞繼奉寄示安  
得有文章老自知之句在人間其懷身輩諸古愈益渾

雅二張氏驟列使君當為割席耳即存亡並舉何害邪  
元美一篇不佞不堪其悲安能使元美見之所謂王生  
雖僅存其憂甚死者某不能贊一辭矣

又

小祇園之樂不減天竺國于時龍象固自縱橫恐非睨  
金支擘海矣大美疏建白何事不佞入賀當踐京口之  
約子與勉之汪伯玉頗具名言驟于吾黨會當日上其  
論元美時亦弋獲明卿月朔補廣之高州書云大宗伯

殷公從群謗中極口昭雪至以身證之也又云元美除  
目已下恐亦不能棄太夫人輒出矣別計踰月景光可  
愛此物誠是也子與何嫌乎七佛精進力而不一切遣  
之自作苦邪

與王元美 十八首

某不幸中於流言足下愛我乃能縷縷為語如汚已者  
是猶不以某為非人足下曩固慮及於此僕雖倔彊亦  
已郡國一吏矣方且局促轉下也元美自信僕豈能以

伯樂望衆人即間及僕它事某一不敢知某情民苟升  
斗粟餬口即飲河之願不欲為盧至長者僕亦名為守  
哉跡僕所御一朱轡而抱關者爾猶尚不免於流言胡  
為爾日蕭然磬折路旁早晚解綬去已定矣一州如斗  
大日出而視事即不崇朝閉閣卧也燕趙南北殆千里  
人相食盜賊嘯聚白日出禦人即邢襄之間有鼯犬我  
輩何謂無益時理亂何謂於吏治厭薄也足下不示僕  
誰復言者今僕亦獨為足下言爾

又

先是明卿書云見足下與某文大自氣象當令海內文章家不復敢置喙二君也李生業為此技不自謂有知己如足下者生平所負數語殊盡明卿知言哉諭謂日與明卿子相三人者狂語大相樂也燕市酒人豈亦効田光計圖李生令秦舞陽來邪明卿志復不小第未見考功近詩元美無慮哉亡論某即二三子視足下其至爾力也其中非爾力也茂秦窮來歸我我猶尚哀憐之

卽論太行諸篇吾見其膽破無復向時倔彊氣為可喜  
蜡後過郡齋見某無少厭薄意卽自咄咄向家人語云  
大恩久不報何能重為詆焉某稍舉足下與明卿微辭  
則吞聲行之日復解顏我不腆之贈屬某全交吏某納  
汚然不敢謂某易與矣元美以為盜俠邪今豈惜傷吾  
二三兄弟之明

又

日致書足下聞足下乃在上谷去天咫爾近復何似某

業已獲落不為齒奈何元美亦復在繼猶泮渙之間徒  
借姓名重它客也豈某素狂僻能累故人元美毋乃汎  
愛作咎邪今雖一握為笑哉彼亦不能不謂吾輩為異  
已某何患焉但子相向不與校士即吾輩危疑之形已  
成不待謫明卿元美尚良食某不去禍終不解子相乃  
自謂與元美為衆所急某郡國吏當末減此殊誤元美  
幸馳來圖之携手為別託千載於一晤非獨契濶私情  
矣



又

無恙河間邸中夜卧誰為搔背癢也中丞公自天授則  
辱諭僕才冠古與元美所期大業者千載矣雖流俗姍  
笑乎然更明興有文章者實自公等始也不已知言者  
哉邢州守臣無狀囹圄輒空虛屬吏亦不能具十獄上  
使者使者據案操鉛槧崇朝力爾今豈無班班河間作  
咎邪

又

曩在魏郡時元美誠自謂吾二人者別矣握手未可知也乃某既歸日從里中兒流連濟水上待故人爾居二月且西回首漁陽檐帷之外奈何坐失晤言之好豈元美洗腆之餘裝而東也亦為僕窮日之力乎某且西所不遺一字書者則已屬駒伏謁元美前又豈謂負郭巷復辱長者車轍也青州之役誰造與謀然何害其元美即使論定更遷向所再輒報罷者元美由是也顧廣陵生游我二人者已甚爾今既以他補其尚釋憾哉久不

得明卿起居徐生豈當已於事而竣雨雪入關道經二  
華遙見三峯挿天白雲如練往來其下秀色射人長安  
咸陽即復蕭索徒見漢家諸陵返照間而已回中西北  
見皆丘垤空同筭頭磴磴自異然已近塞風氣荒涼大  
率秦隴震蕩之餘至今室家尚無完堵一二僚友人人  
自危雖有華櫬緝蘆而寢某與一二孺子妾方如幕上  
燕矣

又

維夏重以奇疾牀蓐百日取之斗極還之司命矣以今  
觀昔悸也如何廓落兮羈旅而無友生惆悵兮而私自  
憐僕所為聞於足下者如此耳即牀蓐患苦不與也曩  
者君家宗人持書來言明卿廣陵生二故人誠以舉吳  
說繹不淺獨恐廣陵生掉臂地下矣

又

昨一餉邊使者為謝茂秦寄二詩見懷似猶栖栖晉代  
間先是得寄許殿卿者盈牘如五臺山草不下數十首

並與遊燕集一語不較元美亦前識其有今日乎李伯  
承走示新刻十本尋為讀之推意就辭未合而戰遂劣  
長驅沾沾自愛也余德甫晚成七言律乃有其勢雖氣  
未備生惡可已小美之下將其人矣但其才力與魏使  
君同倔彊恐慧不逮兩張子耳然均之待足下而興吳  
徐二家皆未易鴈行論也惟是不佞敢謂與足下狎主  
齊盟哉公暇自雅浹旬而梁伯龍繼至再苦於感遇殊  
咄咄太常之為人游子豈易作邪乃拳拳謂不佞必度

江不知其不可矣附嗣音如此則元美因以慰焉

又

某巖穴不深致有是役孟浪如何即小草渡江數月作  
秦中故態再效元美以復此踦然已不免畫蛇之誚矣  
足下視我豈非一失計之窮交乎幸出會諸舟中姑慰  
故人十年跂予之意歸途躬詣起居堂上不宣

又

日為候足下者小祇園清齋辟瘡坐談名理孰與相視

海岱之間雄飲盡石旁若無人也遂不知別時作何狀  
既抵西郭茵馮之上恍忽拍浮之態元美在前褰帷四  
顧月出之光耿耿流思耳千古一快唯足下念焉今遣  
僕泗追謝足下不遠數百里命駕者是役也不佞敢忘  
所以圖報乎奏記諸臺幸假一掾屬與僕泗共之恃足  
下為代益依依於此

報元美

乃不佞即善卧然犬馬之齒及矣是何俞疾俞奇也溝

壑分自填何至使此物苦我狀不可忍視者彼一時也  
炯炯之外傲骨一具耳屬得小馮君所致足下書輒以  
伏枕起色盈牖東吳菰蘆中尚有斯人而廣陵南海化  
為冀壤自春徂秋其在侍者莫不遄已相幸不知轉復  
於邑一大事也足下蓋不獨疑不佞無報章惟四詩雄  
視古今佳集絕唱亦欲速取鑒賞旋自沾沾耳頃已裝  
置座右想像足下歌態每為抵掌旁若無人再奉尺帛  
稱副石室足下何慮焉拙刻自魏使君之厚成書始示



筆削不逮也未經公輩終恐不厭余意矣明卿久州郡亦既習宦乃滇命中沮元老視之顧不如給事時子與遲暮遂循出徇五斗當路顧爭為汲雪事又安可知人又安可量哉沍寒次君姜被無敝乎

又

先是子與一介得讀足下遊陽羨稿去迫欲不待報是以無附音悵悵久之而徐按察寄至矣善卷洞若在下天樂哉瘍乃復作苦今狀豈當如墮屢辨邪不得一撫

我元美扼腕永歎也桓文為盛壯哉斯言狎主齊盟薦  
食自愛梁伯龍口吻不獨五色兼有熱腸惟恐不佞不  
一渡江其所稱述君家兄弟宛然目前子與近稿風格  
似上為是其遷官力乎恨不見明卿耳北鄙荒涼無以  
致太夫人前何耳毳盈筐為敬美可令一出否官學不  
惡也

又

六月徂暑涼生致以元美起居狀甚悉已即東探海市

無旋期不果附報九月幾望復宿周公瑕白雪樓下携  
行中原草堂出元美詩卷讀之彼以謂天球恍然忘其  
為今之人也因與登華不注為送將歸維子之故快哉  
雅夢寐小祇園以大夫人重為游子耳自足下視小美  
乃鴈行即小美視助甫輩既先鳴矣狎主齊盟則吾豈  
敢獨恐罄洛陽之楮不能擗擗白雪樓集又奈何元美  
乎敬美視助甫輩自先驅視元美鴈行也嘗取謝句花  
萼嚶鳴標東君家兄弟不然邪

又

遂得以元美飲諸胥之壚醉相視也解纜而度江之興  
輒盡奈之何一大督郵日嬖辟稱過使客意不恭孰甚  
焉始尚疑元美者契濶自易交情草草耳於諸少年何  
誅足下既已以不佞為陽鱈恐自不免投綸之役所賴  
鼃勉一起即徐吳二生比跡相應而不佞儼然臨焉厚  
集夙誼不惡也子與蠲吉遠於一葦信至稍自致縷縷  
一日而七十函何如陳孟公一滑稽酒此君善汎愛不

能中廢明卿雅習調自喜卽市箝方已溺者之笑苦欲  
元美從之井淪鋪不恤且得請當以鄙俚殿事亞相志  
畧可遺而采以文不朽不佞非托獨為元美有意耳戚  
將軍實壯旗鼓卽至肅不覺嚙嚙作閤喉中如叱敵追  
北狀不佞今在視海劉將軍者自謂十五從軍身五百  
七十八戰破寨九十有三平蜀攘粵閩與維揚口難劇  
談迸齒始悉此二國士可與扼腕顧時又念陳中丞所  
處殷使君雅善禪理至卜姬妾非雀躍者不以為不中

善淫之相又何缺也足下豈嘗聞之乎往夜別足下似  
不與不佞此出不佞何功德乃敢玩世自以作達坐冒  
危殆及讀四詩乃為狂狡所名指反足自耀天上一星  
聊作使中原紫氣渡江來不當如是邪唯是雄唱得和  
愈傳出處所關後賢是厭不即付一介須起居與俱也  
嗣音且就敢前附布謝春深不任秦中故態飛揚之甚  
竟當成一妄夫無疑矣

又

久無次乃龔廷平董生聞問相及也不佞之於是役非  
時奉手札如面談差為快哉吳越諸山水長江大海之  
外亦各言其秀而已近同子與杯酒相勞愈益少足下  
者之人於其間奈何有墨子之忌不出更為金焦洞庭  
之約乎名為好龍滔滔皆是然於元美雕文為工矣曩  
已計除目且自懼之今不然邪舉刺三河大號魏大名  
也能強起就之乎未即隨牒當俟後命一削乞休斷乎  
不可矣

又

子與凡再浹旬迭相主客殊媿鷄黍之誼又浙士往從之者無暇時人人以為愛已也斯驩焉道故唯日不足矣既為命舟請移謁選屬當遠別而往詣元美興復不淺不佞弗能佐飲其間如足下之念我輩者可奈何前啟畧具子與此行唾在其耳足下幸采焉

答元美

初奉汶上書計將一介屬有召命嫌不敢發而熊按察



所寓亦至奈何足下守闕乃于今不佞猶日謂旋復晤  
語者旦夕耳孰知其徑已元美忍心哉繫維弗及海岱  
黯然六羸之故邪惟是足下通章悲壯當路扼腕固當  
聳動天下得請襄事歸奏几筵英魂指髮矣以視阿裒  
抱經收泣終無以傾身大義數為士乎天下寃之不可  
為也白之日而為之聳動天下足下何負焉不朽之大  
者哉而猥藉不佞為足下兄弟聯翩薦疏嚶鳴聖朝即  
二三子與伐木之響阿游自輕贛君小生乃欲相吏邪

薛廣德保懸車之榮則庶幾近之曩便報子與元美理  
帝狀屬當踴躍此命明卿乃患卒業無次耳齟齬家何  
傷敬美乃負包宗舍吳之志稱天下事未可量耽耽欲  
作江南一小英雄尋將火攻伯仁奈何不善備之也足  
下念豚犬不置邪不佞薄祚輒有莊缶之感七月二十  
四日也意亦已惡幸先是又舉一小于鱗孩提目前續  
稿容錄上子遺一介方匍匐亡妻之喪不能出道左薄  
追六羸當抵彭城奈何枉駕掣肘僕所具悉通章太師

為文乎所聞人言固不然矣濮陽乃自列當路饑饉盈  
紙正湏我輩後凋少持王氣交道効意自田間臨內忽  
再決旬稍接貴客野情思曠之甚竣葬入鹿門可復削  
跡不佞非禮法士撫孤姁姁自致耳墓功時不廢促軫  
媿缺云何

又

盖元美三年素饘拮据既已至此奉先君子數千里抵  
殯哭弔紛紜重以賢妹捐館舍在疚可知骨肉凋殘轉

宜自愛一失慰藉不淺慈母弱弟之情及非先君子遺命天道舛薄豪賢扼腕生人之理何可都絕不佞既絕相聞吳郎已頗疑之不意至此日謝方伯云給事有致囊草者將售采輯乃不佞於省中只尺耳卒無片語相加遺又豈能一介存元美豈足下所謂知余志者哉謝又言耿君子亦致其囊草售某一字不知其可矣朱中丞答書云屬難於延見且有編氓之分幸不必為東此奚但猶夫往歲李伯承為藩王使者浹旬而興矚自喜

稍稍出贈章示之爽然自失及欲扁舟往視元美廬中未嘗不咄咄道故當猶有夙度耳

又

向竣役方東迫致聞問元美乃以為辭甚婉今偶忘其婉者辭然恐亦據示布棗起居耳元美今豈以不佞為非達節士邪善乎所答予與書者非敢以誼為不當出再疏再不許而又不出是讐君也先是姑蘇夜語時獨元美兄弟在不佞固已有意於此而辭薄於喉上觀下

獲業以前出慮二少年見謂以我借魴為重而乃為是  
諛以卒不敢發虞翻有云天下一人知己者足以不恨  
則不佞猶可恃在也嵇侍中矯矯頭血豈能一日忘鍾  
郎五步之內哉王偉元所不論已悠悠之談非子與誰  
當語者不佞東時亦微及之今不識所語何狀以不佞  
而言天下豈有才如元美而徒出者乎誼又無不當出  
可自解斯二者皆天也此何損於千載以後身悠悠之  
談當自入朝之口不佞亦嘖有之不恤已乞骸疏似不

當更上覺非老成耳安之移將自至觀所處我輩兩人何如為久速可矣

又

不肖孤奉母亡狀乃辱使者愍勞儼然臨祭不遠數千里敢不聞命雖非至性念始寡藐以有今日不覺夷俟自悛耳如蔬啖麥廢而任之吳俗視趙魏難奚啻倍蓰足下治之考則倍蓰趙魏上當自其才具是矣孤所量也扶柩而東使者索報不佞左執紼右操觚倉卒數語

失以大事乞哀長者方圖馳情不意慨然開以不朽豈  
尚不忘司馬公之役乎幸為表先大夫太恭人之墓而  
題之以傳令某徼其寵靈以光丘隴得稱濟南阡亦一  
快也頃以葬期正甫為近乃託之誌當嗣奉覽紀述一  
通附錄采擇正甫耽耽恐不得此以自疏也諭乃云云  
吾來正甫一日耳海岱公舊遊者肯更為擊轡否

與王敬美

五首

日得子與書讀敬美誄其太恭人者文無害也誌銘形



櫟耳梁生恒幹魁梧乃能宛延於君家兄弟竒哉東行  
瘡瘡自罷囊中裝懸罄矣攬眈之餘空言盈篋不如一  
囊錢也然御我為幸沾沾焉不知其所苦歸為卒業門  
下而令無負遠游不佞所復執事且起居焉者如此

又

曩詣弔舟中觀足下稽顙狀若將捨入剝木者心知天  
性孝友人也盛積憤而一朝理于帝快何如焉即以遜  
諸伯兄不敢自見而精志感動愈無掩于二難之誼矣

不佞以嫌乃無一介之使致焉以慰伏闕之情者快快  
耳襄役幸出薄遊先已從元美勸足下宦學不惡也壯  
哉敬美之志天下事誠未可量以不佞而量足下尋且  
指掌機雲之間而獨包宗舍吳已乎不幸悼亡不能出  
留道左亟承存問重以腆儀千載龍門前期自愛肝膈  
之言哉肝膈之言哉更不意晚得一元美於敬美士亦  
安可輒定交也三復北行諸稿老筆餘勁實嚴具體千  
里長風已在蹄下顧願搏轡曲折蟻封斯秋駕之技已

以妻竣葬當為足下視草由居必有所效今不具列云

又

不佞之於元美自天交之邂逅者耳非嘗有為之紹介足下所知足下於元美而令視不猶兄某非人哉不然豈其仰止而慙焉逡巡如諭云也

又

不佞之於足下視猶元美也豈以友于一堂為可慰藉斯人而二三子遂願交驩此自足下載錫之常耳奈何

兼鍾並毓維天是私崛起鴈行翱翔氣類使不佞賤焉  
有意乎其來者顧子遺病夫處身僻左所不聞問遠莫  
致之實無便報以間不忘有何指趣如諭督過乎足下  
非不知不佞積勞左右即亦愛不佞欲亟得所起居狀  
若友于一堂始自厭也不然談笑道之何以得此於足  
下邪不知不佞欲得足下起居狀甚足下矣子與云云  
妙有所置致自樂事足下庶幾能愉快乎

又

歲杪得徐按察所為致筐篚之珍謹以進太夫人前矣  
壯哉敬美所言某即不佞敢孰不曰斯與元美故自先  
朝一藝文吏乎大江以北連黿鼎顛天何恙哉元美遄  
已太夫人善飯即時態紛糾出緒餘應之耳以君雄才  
發軔見絆海內之士想望展驥生平志意何云欲畢邪

滄溟集卷三十

欽定四庫全書

滄溟集附錄

墓誌銘

濟南殷士儋撰

余以隆慶丁卯誌徐恭人墓已已張太恭人卒與于鱗  
大人合葬余又誌其墓今才一歲爾且誌于鱗悲夫文  
章道喪瀰瀰日以下蓋千載于茲矣明興北地李獻吉  
奮起而力挽之于鱗生承其後益拓其業斐然成一家  
言雖古大雅者流何以過茲可謂當代之宗工鉅匠垂

不朽者矣于鱗李氏攀龍名父贈中憲大夫知府寶母  
即太恭人張其族系及世有高誼與太恭人守節語具  
余前誌中初太恭人夢日入懷生于鱗九歲而孤比就  
外傳則余及今長史許殿卿皆以髫年相約為知交歲  
與之俱當是時則恥為時師訓詁語人目為狂生于鱗  
自謂非狂矣又九歲為諸生廩於郡庠庚子鄉薦第二  
人甲辰賜同進士出身試政吏部文選司乙巳以疾告  
歸歸則益發憤勵志陳百家言附而讀之務鉤其微挾



其精取恒人所置不鮮者拾之以積學蓋文自西漢以下詩自天寶以下若為其毫素污者輒不忍為也丙午還京師聘克順天鄉試同考試官簡拔多奇士丁未授刑部廣東司主事既曹務閒寂遂大肆力於文詞余時為檢討日相引上下其議論而于鱗益交一時勝流若吳郡王元美數子者名乃籍甚公卿間矣三年陞員外郎明年遷山西司郎中有邊將觸法不至死者柄臣子怒其不賂必欲寘諸辟而竟不能奪之于鱗從末減後

其人至大帥果大著勲伐云癸丑出守順德務為休息  
愛利之政其大可紀者順德所屬舊有種馬場歲入賦  
公家而時監司誤以為營馬牧地增賦至二千七百餘  
金于鱗為請悉蠲之郡故有永濟倉以自給後糧輸京  
師而軍食益乏又為請得留郡如異日焉將作所徵于  
真定大名廣平順德諸郡者于鱗以為順德土狹民貧  
不宜與諸郡比減其供如真定十之三沙河之民役過  
客者越永年抵邯鄲界中始息肩邯鄲民報之亦然皆

跋涉一百七十餘里憊矣于鱗曰民安得任非其土之役使永年不惜數十人之力則兩邑之力皆可寬也又為之請罷矣鉅鹿官亭集者大聚也界在真定隆平南宮新河之間羣盜嘯聚無時捕之如搏影于鱗請移防秋別駕往鎮之秋至則復戍內丘而盜不敢復窺順德界中又謂京師仰餉于東南或不時至而止直隸河南山東諸處近河百里而遙者可令毋出賦錢皆賦菽粟浮于河以達于京師此不獨國家之便民亦便也他如

散召募之卒以杜事變移巡司于黃榆嶺以備非常倣  
常平以時畜積嚴保甲以弭盜賊皆深計長慮非旦夕  
視其民者部使者至順德才一日讞獄罷使者嘆曰太  
守安得不冤若此比三歲有十數最書擢陝西按察司  
提學副使關中士素習古文詞得于鱗為師又惴然勃  
興矣于鱗為人素羸頓不習西土西土當地裂後猶時  
時動搖數心悸又念太恭人獨家居遂乞骸骨歸故事  
仕在外者無以病告即乞身罷耳不復叙時銓部憐公

才特取旨予告疾已且復叙異日獨何仲默視此以方  
于鱗實異數也歸構一樓于華不注鮑山之間曰白雪  
樓于鱗為人高克有合已者引對累日不勅即不合輒  
戒門絕造請數四終不幸一見之既而于鱗亦不自駕  
修請謝也其樓居時余方在告家居獨殿卿及余時往  
來觴咏其間他曾不得一當于鱗凡十歷年所今天子  
用言者起為浙江副使二年稍遷叅政入賀過家覲省  
將南尋陞河南按察使遂奉太恭人俱越四月而太恭

人卒于鱗持喪歸甚毀及小祥而漸平無何暴疾再日而絕歲庚午八月二十日也年五十有七所著有白雪樓集行世他詩尚若干首文若干首或問于殷子曰王元美謂律至仲默而暢獻吉而大于鱗而高要之有化境在古惟子美今或于鱗雖于鱗亦自謂擬議以成其變化矣于鱗信才意不至如所稱乎殷子曰夫親見楊子雲者肯信桓譚之論非私哉夫于鱗雄渾勁迅掉鞅于詩壇彼其視獻吉詩猶傳會龐雜文菱菱寡灝鴻

洞之氣所為推獻吉者多其剷除草昧功也故曰能為  
獻吉輩者乃能不為獻吉輩者然于鱗方且痛人詆其  
文辭相矜不達于政游刃引割所至弦歌亦治操槩凜  
潔耻為色澤稱其為文于鱗獨文士乎哉于鱗妻徐氏  
封恭人有二妾蔡氏盧氏所生三男一女駒娶曹氏女  
繼娶應州知州馮應奎女采瑤馴聘周府左長史許邦  
才女邦才殿卿也女適永清訓導艾濟子芹獨馴盧出  
他皆恭人出駒有三子二女鴻仁聘進士于鯨女鴻儀

未聘鴻儒聘張希全女女一許嫁舉人王見賓子衡一  
後公歿七日而生嫁艾氏者有外孫一人曰維高駒卜  
隆慶五年三月十有一日葬公於牛山之原徐恭人祔  
焉請殿卿狀來乞銘駒吾門人也竟其所之亦可使千  
里無契需銘曰爾祖有言死而不忘豈于鱗與吾有涯  
知也無涯鬱而為書劇削巧利滌濯滓垢追趨古初大  
者天行雲盤星迴小者綺䟽績舊彌新忽出倏入霍然  
霧除赫赫厥聲施于當世海內寡如豈惟文章以緣吏



事因試弗理入掌庶獄出典大邦柄文持紀書獄獄平  
治人人安風士士起鴻飛冥冥羅者不忘思儀其羽曷  
篤其生曷嗇其成不遐錫祉璧傳士林蛻委斯歲永憑  
其里

李于鱗先生傳

吳郡王世貞撰

李于鱗者諱攀龍其家近東海因自號滄溟云當其業  
成時海內學士大夫無不知有滄溟先生者而自其六  
七友人居恒相字之故其為于鱗獨著于鱗之先世濟

南歷城人父寶以貲事德莊王為郎善酒任俠不問家  
人生產繼娶於張夢日入懷而生于鱗于鱗生九歲而  
孤其母張影相弔也旦緝纊不足以資修脯而自其挾  
冊請益塾師為之遜席者數矣補博士弟子與今左長  
史許君邦才少保殷公士儋結髻亂交晉江王慎中來  
督山東學竒于鱗文擢諸首然于鱗益厭時師訓詁學  
間側弁而哦若古文辭者諸弟子不曉何語咸相指于  
鱗狂生狂生于鱗夷然不屑也曰吾而不狂誰當狂者

亡何舉其省試第二人三年始成進士試改吏部文選司其明年移疾歸久之疾良已同考順天試獲奇雋居多又明年授刑部廣東司主事于鱗既以古文辭創起齊魯間意不可一世學而屬居曹無事悉取諸名家言讀之以為紀述之文厄於東京班氏姑其佼佼者耳不以規矩不能方圓擬議成變日新富有今夫尚書莊左氏檀弓考工司馬其成言班如也法則森如也吾撫其華而裁其衷琢字成辭屬辭成篇以求當於古之作者

而已操觚之士不盡見古作者語謂于鱗師心而務求高以陰操其勝於人耳目之外而駭之其駭與尊賞者相半而至於有韻之文則心服靡間言盖于鱗以詩歌自西京逮於唐大歷代有降而體不沿格有變而才各至故于法不必有所增損而能縱其夙授神解於法之表句得而為篇篇得而為句即所稱古作者其已至之語出入於筆端而不見跡未發之語為天地所秘者創出於胸臆而不為異亡論建安而後諸公有不徧之調

于鱗以全收之即其偏至而相角者不啻敵也當于鱗之為主事遷員外郎以至山西司郎中曹事寢以劇守文法無害而其業日益進大司寇有著作輒以屬于鱗籍籍公卿間然于鱗竟無所造請干贄不為名計出曹一羸馬蹉蹉歸杜門手一編矣其同舍郎徐中行梁有譽不佞世貞及吳舍人國倫宗考工臣相與切劘千古之事于鱗咸弟蓄之為社會時有所賦咏人人意自得最後于鱗出片語則人人自失也于鱗雅不欲以刀筆

見長然其聽讞最號公平柄臣子銜邊帥不通賄中以  
法欲置之死于鱗持不可後其人卒自奮功名致大將  
俄出守順德問所以守順德者于鱗曰使吾僕僕途道  
事嚴客恭鞠臆睨上官之色而進之則俱有所不能  
晨興坐堂皇揖屬吏考計延見鄉老問疾苦為興除脫  
若承蜩矣于鱗之守順德可一載所不報最則曰君子  
之至於斯也吾或未之見也奏記臺使者手自削牘牘  
多古文辭語為其名高也者而已之然于鱗嵩嵩自濯

洗勤于大要居久之政聲流通三輔前後尉薦亡慮數十鄰郡嚴事于鱗若大府以故得請白媮志嘗蠲馬牧地垂三千金留永濟倉粟毋灌輸京師以餉戍卒裁將作供比真定十之二益永年傳於沙河邯鄲界中寬二邑力移郡尉置鉅鹿官亭扼盜衝又移巡司黃榆嶺為晉趙關前後爭得之臺使者毋以難也于鱗又謂京師仰東南餉不時至而燕齊汴趙邊河百里而近者毋出賦錢皆賦菽粟浮於河達京師緩急一策也時頗譴之


滿三載贈郎寶如于鱗官母張為太恭人尋擢陝西按察副使視其學政于鱗謂陝古西京也先朝士大夫北地外多陽浮慕古文詞而時離之思以寶反其始有機矣亡何其鄉人殷中丞來督撫以檄致于鱗使屬文于鱗不懌曰副使而屬視學政非而屬也且文可檄致耶會其地多震動念太恭人老家居遂上疏乞骸骨拂衣東歸吏部才于鱗而欲留之度已發無可奈何為特請予告故事外臣無予告者僅于鱗與何仲默二人耳于



鱗歸則構一樓田居東眺華不注西揖鮑山曰它無所  
溷吾目也繡衣直指郡國二千石干旄屏息巷左納履  
錯於戶奈于鱗高枕何去亦毋所報謝以是得簡貴聲  
而二三友人獨殷許過從靡間時徐中行亦罷官家居  
坐客恒滿二人聞之交相快也于鱗乃差次古樂府擬  
之又為錄別諸篇及它文益工不跽而走四裔然居恒  
邑邑思一當世貞兄弟曰大兒孔文舉小兒楊德祖吾  
其季孟間哉而世貞則挹損不敢以鴈行進也大司空

朱公衡時巡撫司于鱗間迫起之為置酒懽甚自是諸公推轂于鱗者相踵而會今上初大徵名耆碩于鱗復用薦起浙江按察副使嘗視海道篆按覈軍實一切治辦俄遷布政司左叅政奉萬壽表入賀道拜河南按察使中州士大夫聞于鱗來鼓舞相慶而于鱗亦能摧亢為和圓方互見其容稍稍進無何而太恭人捐館扶服還里不勝毀病困久之小間尋暴心痛一日卒年五十七所著白雪樓集三十卷行於世子駒博學能文章有父

風王子曰世能名于鱗莫能名于鱗所以其旁睨千古  
欲凌而上之乃至不得盡廢其遺要之創獲之語烺烺  
象表者不虛負也或謂其聲不暢實位不配望壽不竟  
志以為恨夫漆園玄亭杜門著書而生寥寥者豈一于  
鱗也籍令台鼎足重李生彼夫屈宋兩司馬幾先得之  
矣無涯之智結為大年月日經天光彩常鮮嗚呼何恨  
哉



滄溟集附錄